

## Summer Wind

A jede Mensch aus'm Dorf un die was mit dere Baurewertschaft zu tun ghat han, wisse das des net immer leicht iwer es Johr war, wann des Wetter net so ausfall war, wie a jeder sich des gwunsch hat. Manchi hätte gere mehr Sunnschein, vor ihre Felder ghat, aneri wär es liewer wann de Reen noh ihrem Wunsch, aus die Wolke kumm wär, un manchi hätte liewer mer Wind ghat. Es ware Johre do hat es schon am End vun'm Fruhjohr angfant zu Reene, un wie dann die heiße Sunne, anfang vun im Monat Juni unbarmherzich vum Himml scheine, un noh der Summer Wind die Erd so hart ausgetrucklt hat, dass mer schon bal gar net mit dr Hack des Feld ufrudle hat kenne. Umso a Zeit war de Bauer uf'm Dorf Unwillich un stark bees iwer den Summer Wind gin. Dann hat,s awer wieder Johre gin, wu es Wetter noh em Bauer seim Wunsch ingetroff war. De Reen war bei Zeit un langsam uf die Felder gfall, die Sunne hat so gscheint das es net zu heiß, awer ach net zu khiel war, sogar der Wind hat sich zuruck ghall, mer war sogar uf dr Mahnung, dass der in selem Johr mit die Leit ghall hat. Em Bauer sei Herz war iwer froh, wann er mit seiner ganzi Familie am Phingscht Montaa uf, de Hottar gfahr is, un sei Felder uf m Hottar angeschaut hat, wu dann der Summer Wind ganz leich iwer die Frucht un Gerscht geblost hat, dass mer gment hat mer steht vor eem Meer wu der Wind mit die Welle spiele tut, die Halme han sich hien un her geboo, un han so gut gschmeckt, vun Knoppstengle, Pipatsche un aneri Blume was so im Feld gwackst sin. Der Wind hat die guti Luft deni Leit, die wu sich net Satt schau han kenne, ins Gsicht gebloost, un ihne a großi freit gmacht Es war a Hoffnung ufkumm das in selem Johr denni Baure ihre Bode net leer bleiwe wäre. Awer die meischti Zeit war es bei uns im Hecke Banat, schon anfang Juni stark heiß gwen, schon beim Kukruz hacke han die Leit stark gschwitzt, un sin net satt mit Wasser trinke gin, Froh ware dann die meischti, wann so etwas kiehle Summer Wind vun Werschitz her geblost hat, er hat em a bisl abgekhielt vun der Summer hitzt, un wann er phaar Tääch geblost hat han alli Leit gwisst, dass es bal Reene werd. Es is awer aach oft passiert, dass der Wind den ganze Staab vun im Fahrwech, der Knechl hoch dorte gelee hat, in die Luft un iwer es Dorf gebloost hat. Erscht wann der Schnitt do war, hat mer es an manichi Täch gar net ausghall kenne, so heiß ware des gwen. Un wann dann der Schnitt un Beifiehre rum war, un die Dreschmaschine nimi im Dorf gebrummt han, ware die Meischti Leit ganz braun abgebrennt, vun dere heiße Sunne, froh ware se awer alli, wann so a Summer Wind in Zeite an solchi Tääch gbloost hat. Der Summer Wind hat zu die Leit derzu gekheert wie eener vun dr Familie, er is mit ihne gang vun ihre Geburt ane bis ans Grab. Noh sin dann ach Zeite kumm, wu manchi vun unseri Schwoweleit a ganz anere Wind in ihr Gsicht un iwer ihre Grab geblost hat, der war awer viel rauher un Kälter wie unser Schwowische Summer Wind. So vieli die vun derhem wech gezoo sin, un nimi zurück kumm sin, han sich gar oft an den Summer Wind erinnert, er hat ihne die eerschi Zeit gfehlt. Heint blost der Wind noch immer bei uns derhem dorch s Dorf, er blost dorch die Gasse, wu schon bal gar khe Heiser mer stehn, er blost dorch unser ehemolichi Gärten, in deni khe eenzich Obstbaum mehr steht, er blost iwer de Friedhof un traat den Geruch vun die Betonplattn iwer es Dorf, er blost sogar heint noch dorch manchi Leit, die schon lang vun unserem Dorf fort sin, dorch ihr Seel, un erinner se an unser Summer Wind.